

海

國

圖

志

海國圖志卷十

歐羅巴人原譏

東南洋五

海岸之國

侯官林則徐譯

邵陽魏源重輯

緬甸

緬甸與暹羅安南三國在阿細亞洲南洋歐羅巴人以其與印度交界統謂之爲印度外前代歐羅巴人罕至其地所知者不過孟阿臘安治市河之東岸而已伊拔畫師比多里彌所繪地理圖其圖內大海灣之西岸有

梯泥城卽緬甸之底泥色領城也。意大里亞人曾至中國海岸而所繪之圖亦未詳確。佛蘭西國當日攻取麻六甲地所考察者僅附近一隅。佛蘭西又曾遣羅比里至暹羅國欲行教化始略知暹羅國大概。近日英吉利已得印度之地多與三國交界故所說此方之事雖不詳備較前代歐羅巴人則所得爲多。緬甸國建都阿瓦又謂之馬臘麻原是三國一曰阿瓦一曰阿臘干一曰秘古各不相統恒相爭奪惟緬甸當衝受害尤重。千有六百年明萬曆二十八年緬甸興兵攻服秘古迨千有七百年

康熙三十九年秘古復約荷蘭西洋兩國之兵同攻緬甸屢戰屢勝直抵阿瓦僞獲緬甸之底布里王維時緬甸反屬于秘古然緬人强悍突有阿羅般部落招集土兵恢復阿瓦國都自立爲王盡收緬甸舊地遂出師攻滅秘古國其子山巴領嗣位後秘古復叛山巴領又攻勝之遂乘勝並取暹羅久仍爲暹羅所敗僅存麻六甲以西沿海之麻爾古底呢色領等城耳山巴領歿其弟皿底臘疑勃老嗣位又並合阿臘干爲一國此外尙有攻取加渣爾加色等處軍威可謂勦矣然以麻爾古之地皆與

孟阿臘接壤孟阿臘屬于英吉利兩國接壤日久復起

兵爭于有八百二十六年

道光六年

英吉利遂起印度之兵

攻緬緬恃其習戰視英寇蔑如也然緬軍紀律不嚴進銳退速以此爲英軍所挫英軍亦不習其水土地險餉艱瘴惡多疾難以深入本欲退師反聲言直取阿瓦長驅而進緬軍屢衄氣阻遂卑辭求和乃割阿臘干麻爾古達阿依底尼色領沿海之地復償英吉利兵餉始罷兵然緬甸陸戰全恃堅銳木柵環遶重濠有時英吉利兵馬亦爲其所拒其國賦稅如東方中國之法以田地

錢糧爲正供，此外征收外國貿易稅餉，不作正項，別貯內庫。緬甸暹羅安南皆然。傳聞緬甸國王與西洋構衅，講和津貼英軍兵餉，咄嗟立辦，可見其國之富。緬甸暹羅安南政事大略與東方各國相同，權柄專制于王，百官不得專擅，所用律例皆合中國印度兩國之律，參酌損益而行。如緬甸之職官，若翁疑士、若敬翁多士、若阿達翁士，皆在國都助王理政，並有律官出外分轄各部，征收賦稅，解都供餉。部民有事先赴訴麥翁衙門，次始上控于羅都衙門，由羅都而達于王，以判斷之。有烙鐵

之刑有咒詛之法斟酌施用與印度略同印度外咸知
文字惟緬甸語音麗雜有用佛語有用韃靼里音語有
用中國音語參雜而成歐羅巴人不能分其句讀望之
如一長句說寫俱難書籍皆編貝葉國王則以象牙爲
篇頁以金飾邊賄以描金盒並有雕刻成字而金飾之
者藏書雖富專以講論神明爲主而史記音樂醫學醫
譜謂之雜說小書惟安南文學獨遵中國較緬甸暹羅
爲深奧緬甸屋舍最陋以竹插地用簾繫架用席作牆
而苦覆之卽謂落成大者不日可完小者頃刻立就雖

潦草而便易風雨坍塌既無推壓之虞回祿偶遭亦無
蕩貨之戚伊底河發源西藏南流經緬甸之麻羅城而
入海

案伊底河謂雅魯藏布江即大金沙江也

緬甸國東界南掌暹羅西界孟阿臘南界海北界西藏
雲南以阿瓦爲國都領部落四十有八戶口約四百萬

名原本

阿瓦國都

門額爾

西糜

哥里布

江墩

凍米

拉比那古

巴爾脉

芝補

窮皿

打梗

翁蔑拉布拉

光墩

邦布

磨觀

邊定

拉公厘

高梗

蒙厘布

郎欲河

班沙

巴宕謬

麻拉

西格呀都

麻渣布

阿拉干

渣岩

特囊休

茂都

皿特

新達

比衣謬

呢特

濟騷

麻欲疎

蘭梗

皿巴

麻爾打曼

東俄

底奴彪

波丹謬

哥士皿

衣岩

知那麻幾爾

巴三

西利嚶

麻羅

大金沙江由此城西入東印度

母哇

原本止此

沿革

原無今補○止取其涉海國者

新唐書驃古朱波也自號突羅朱闍婆國人曰徒里拙在永昌南二千里去京師萬四百里東陸真臘西接東天竺西南墮和羅南屬海北南詔地長三千里廣五千里東北袤長屬羊苴咩城凡屬國十八曰迦羅婆提曰摩禮烏特曰迦黎迦曰半地曰爾巨曰坤朗曰偈奴曰

羅聿曰佛代曰渠論曰婆梨曰偈陀曰多歸曰摩曳餘
卽舍衛瞻婆闍婆也彌臣至坤朗又有小崑崙部王名
茫悉越俗與彌臣同由坤朗至祿羽有大崑崙王大於
彌臣由崑崙小王所居半曰行至磨地勃柵海行五月
至佛代國有江支流三百六十案此當卽大金沙江有川名思毗
離芮土多異香北有市諸國估舶所湊越海卽闍婆也
十五日行踰二大山一曰正迷一曰射鞬有國俗與佛
代同經多茸補邏川至闍婆八日行至婆貽伽盧國土
熱衢路植椰子檳榔仰不見日王居以金爲甃厨覆銀

氏爨香木堂飾明珠有二池以金爲隄舟楫皆飾金寶
驃王出與以金繩床遠則乘象嬪史數百人青髻爲圓
城周百六十里有十二門四隅作浮圖民居皆鉛錫爲
瓦荔支爲材俗惡殺拜以手抱臂稽顙爲恭明天文喜
佛法有百寺琉璃爲甃錯以金銀丹彩紫鏤塗地覆以
錦剗王居亦如之民七歲祝髮至寺至二十有不達其
法復爲民衣用白氎朝霞以蠶帛傷生不敢衣戴金花
冠翠簪絡以雜珠王宮設金銀二鐘寇至焚香擊之以
占吉凶有巨白象高百尺訟者焚香跽象前自思是非

而退有災疫王亦焚香對象跏自咎無桎梏有罪者策
五竹捶背重者五輕者三殺人則死土宜菽粟稻粱薦
大若脛無麻麥以金銀爲錢形如半月號登伽佗亦曰
足彈佗無油以蠟雜香代炷與諸蠻市以江豬白氎琉
璃罌缶相易婦人當頂作高髻飾金珠琲衣青婆裙披
羅段行持扇貴家者傍至五六近城有沙山不毛地亦
與波斯羅門接距西舍利城二十日行西舍利者中天
竺也南詔以兵強地接常羈制之案緬甸與東印度接壤惟唐書畧見端倪
故節錄之元明與中國構兵皆于海國印度無涉故不錄

謝清高海錄曰烏土國在暹羅蓬牙西北疆域較暹羅
更大由蓬牙陸路行四五日水路順風約二日到佗孟
爲烏土屬邑廣州人有客于此者又北行百餘里到媚
麗居又西北行二百餘里到營工又西行二百餘里到
備姑俱烏土屬邑王都在益畫益畫卽阿由之音轉備姑入內
河水行約四十日方至國都有城郭宮室備姑鄉中有
孔明城周圍皆女牆參伍錯綜莫知其數相傳爲武侯
南征時所築入者往往迷路不知所出云北境與雲南
接壤雲南人多在此貿易衣服飲食大畧與暹羅同而

樸實仁厚，獨有太古風。民居多板屋，夜不閉戶，無盜賊爭鬪。由備姑西北行，沿海數千里，重山複嶺，并無居人。奇禽怪獸，出沒號叫，崇巖峭壁間多古木奇花，所未經覩。舟行約半月方盡，亦海外奇觀也。微第缸在烏土國大山之北，數十年來英吉利新闢土地，未有商賈，其風俗土產未詳。

國史館郭世勲傳：乾隆五十五年，暹羅國王鄭華表稱乾隆三十六年被烏土國搆兵圍城，國君被陷，其父鄭昭克復舊基，僅十分之六，其舊地丹著氏麻叨塗懷三

城尙被占踞請詔敕令烏土國割回三城

詔以烏

土國卽緬甸別名前此緬酋孟駁與暹羅紹氏構兵非

新曾孟隕之事今緬國已易姓何得上煩中朝追索侵

地命兩廣總督郭世勲檄諭止之

案暹羅國別號赤土國則緬之號烏土均

以填壤異色得名

地球圖說曰阿瓦國東界暹羅南界旁葛刺海并印度

洋西界天竺國并旁葛刺海北界西藏國又內有三小

國卽阿瓦皮球馬搭班是也其百姓約有二百七十萬

數都城名阿瓦城內民五萬民矮小而健不辭勞瘁善

經營巧勝遲民，但貪心太重，一若以天下與之而猶未足也。首不戴帽，身穿夏布，女裙而不褲，廉恥全無。好佛教，日以花果食物供養其僧，僧皆黃衣遊食。近有耶穌門徒傳授聖教焉。刑政與他國迥異。君之名固不敢呼君之姓，亦毋題說。有觸即加大辟。又男至二十歲以上者，三年內必以一年供王事，或佃或兵，有至大之江名伊犁瓦地產金寶石大樹土油鹽硝象鹿牛馬等所貨物茶葉布帛等。

地理備考曰：阿瓦國在亞細亞洲之南北極出地六度。

至二十七度十分止經線自東八十九度四十五分起至九十八度五十分止東至中國雲南暨暹羅國西連印度國南接榜加刺海灣北界亞桑國南北相距五千五百里東西相去二千里地面積方約四十萬零五千畝烟戶七兆餘日本國地勢北方則岡嶺層疊迤邐綿亘中央則邱陵稀疏峻峭無幾南方則平原坦闊恒遭淹浸其伊拉瓦的西當薩嚨德那塞靈亞刺干等乃本國最長之河縱橫貫徹田畝甚腴穀果極豐禽獸草木靡弗繁衍土產金銀銅鐵錫鉛鑽石琥珀紅玉窩宅碧

玉琉璃、花石、信石、綿花、烟葉、甘蔗、藍靛、木料等物。地氣溫和，非雨則熱，每歲如常。王位世襲，所奉之教，乃釋教也。其貿易通市，與印度中華居多。本國初爲北古國管轄，迨既自異，別爲一國。乾隆五年，國變亂，賊寇猖獗，越十二載，北古國人復行政奪。時本國人亞隆巴拉率衆逐之，大獲全勝，興國立業，踐祚爲君。其後歷代嗣君開闢疆域，將國內外爲十有一部：一名阿瓦，乃本國都也。建于伊拉瓦的河左，茅舍居多，木室亦有，至若磚瓦屋宇，爲數無幾。一名亞拉于部，一名加賽部，一名仍塞蘭

部一名馬爾達般部一名美爾固宜部一名北古部一名達歪部一名德那塞靈部一名雲山部其通商衝繁之地曰郎昆曰波羅美曰業能軍此外又有進貢屬地一名加星安一名薩巴音一名見一名達翁蘇一名迭一名巴刺安一名森一名拉襪一名達撓一名薩拉翁外國史畧曰緬甸國北極出地自十五度四十五分及二十七度二十分長二百六十里闊一百里北連雲南南連暹羅並馬他班海隅東連老掌並雲南西連英吉利藩屬及旁甲拉海隅海濱甚低餘皆山產鐵銅錫紅

銅鉛金銀石油火硝食鹽紅藍寶石最多石油由深井
汲出色青厚燒之出黑烟林有堅木宜造船亦出漆油
並紫梗禾甘蔗粟米豆烟縣花青黛內多象虎豹熊野
貓野雞鵝鶉金雞沙佳鵲居民約八百萬地多荒蕪罕
耕種其人身高體健顏色黑紫雕題文皮男女多裸身
耳穿孔掛金銀飾性貪不喜笑性詐而傲崇佛養僧其
僧黃衣髡首乞食居寺多造塔以金鑲佛像民貧官富
語多異音中多老掌文萊之民皆拜佛山內有野民族
類愈不一緬甸人能織文花布亦能刻花木造奇巧金

飾惟不知天主教。人好武勇，性酷虐寡慾，而惰男逸女，勤不濫飲食，每飯恒嚼檳榔老葉，好飲酒，不好殺獸，不食牛肉牛孀，男女均以黑色染指甲口唇，若敬人則坐不立，男女往來不以苟合爲辱，所立規矩法律俱由印度來，亦多與中國合。其始在周景王時，距今二千三百九十一年前，由印度遷至，一千七百四十年前遷都於他處，今日尙存其廟古蹟。于元順帝三十一年始建，今之阿瓦都城，歷傳三百六十九年，有文萊島之民興師敗緬，後再戰敗，而文萊反歸緬。乾隆十四年，文萊買

西洋火器并募荷蘭葡萄亞各國人協力攻緬陷其都
逐其王據其國有一小官起義兵百人抗拒既而國民
雲集盡力恢復後中國兵兩侵其地多病瘴癘退師緬
人掠其軍以配土女別居新城故今緬地尙有漢人苗
裔又與暹羅屢交戰奪暹全境兵氣益驕後緬遂以兵
侵印度英人擊退之道光四年國王再侵英之印度界
時緬已東盟越南南服暹羅覬覬印度之富遂傾國而
來英軍兩年鏖戰于東界不服水土斃者甚衆英終不
退兵復添新軍水陸并進聲言將擣其國都緬王畏懼

乃求會于南海邊地前時戰費至九百萬兩後彼此息兵亦無侵遑羅之事但尙時與英人肇衅道光二十六年更立之君亦被其世子廢逐失位○居民各族類共約八百萬地分四千六百土司民貪財不善通商貿易皆在內河若米若魚鹽運出者若石油白糖蒜紙兒茶黃銅金等器其漆器綢緞皆由中國來由以拉瓦的江達班摩與雲南通商琥珀寶玉象牙檳榔燕窩等物所買者綢緞布匹金箔糖果紙等貨緬人亦與老掌交易老掌族類最樸實山內多寶玉虎象隨時進貢戰亦出

助陣焉。○緬都曰阿瓦城瓦垣而竹屋街衢甚廣廟燿
宮宏居民三萬北極出地自二十一度五十分偏東七
十六度道光十九年地震安拉補臘爲唐人所居大鎮
國之舊居也居民二萬蘭雲馬他萬巴心三城皆海口
蘭雲城與印度貿易產堅木多運出造船每年價銀十
五萬兩運入者多布匹附近城有大廟高塔愚民隨時
赴之燒香拜佛用重金鑲塑木像前時之都屬文萊國
者稱曰破米多古蹟。○王操全權辦事不以律國中產
業隨意奪給有事則征餉納稅無定則王所乘白象以

金鑲殿嵌以寶玉與宮無異履花毯食珍羞人敬象如
大臣王戶俱會同操權有親政大臣一位輔政官一位
副理政事通事官一位各部立帥各郡置官有土司調
司皆世襲無俸祿故勒索爲常

地里備考曰英吉利在亞悉亞兼攝之地在印度緬甸
之間者一曰亞桑緯度自北二十五度三十分起至二
十七度四十五分止經度自東八十八度二十四分起
至九十三度三十分止東北界西藏西連印度國南接
阿瓦國長約一千一百餘里寬約五百里烟戶一兆餘

口境內岡嶺絡繹河之長者曰的各隆曰矮斯曰的索也曰登塞里亞田土膴腴穀果豐茂土產金銀銅鐵茶烟繇花甘蔗胡椒香料材木煤炭等物地氣溼熱技藝精良貿易昌盛首郡名若爾合德昔自爲一國今爲英吉利所兼攝

阿刺干部在阿瓦國之西長約一千八百里寬約二百里烟戶二兆六億口境內岡陵平原兩相間隔田土肥饒穀果豐稔鳥獸草木靡弗充斥土產金銀鹽蠟象牙等物地氣溼熱技藝寥寥貿易興隆首郡亦名阿刺干

昔自爲一國今爲英吉利所兼攝

馬爾達般部東連暹羅國西枕大海南接業地北界北
古地統計地面積方約一萬三千五百里烟戶五萬餘
口境內岡陵絡繹出土廩厚穀果豐登土產米鹽藍靛
蘇花荳蔻烟葉象牙木料等物地氣溫和昔本阿瓦國
一部今爲英吉利兼攝之地

達威部東接暹羅山西枕海南界巴展河北連馬爾達
般部長一千一百五十里寬一百五十里地面積方約
一萬七千里烟戶三萬口境內岡陵延袤田土膏腴穀

果豐稔鳥獸草木靡弗蕃衍土產錫蜜鹽玃象牙燕窩
沙藤材木豆蔻香料等物地氣溫和人安物阜其地分
爲三大部一名業一名達威一名德邦塞靈昔本阿瓦
國之部今爲英吉利兼轄之地以上皆受東印度榜加
刺兵帥節制

外國史畧曰緬甸內英吉利屬地皆緬甸讓出海邊地
在緬南北極出地十度及廿八度長一百六十里闊
十四里海邊別有衆島或居民或荒蕪東界皆山高約
至四百丈地亦豐盛蘇鐵堅木可建船屋所出之物如

蠟象牙兕角鹿肉燕窩海參胡椒檳榔蠟山內出紅鉛錫居民多緬人時英人據其地其地一萬三千四百山因與暹羅交戰大半荒蕪英人招百姓以保護其地民數頓增民多受瘵人流徙至海邊者山內有加連士蠻未向化却喜聽耶穌之教○別有英國所據之地曰馬他班在日支河間地豐盛北方歸緬甸天氣清爽不苦熱地荒蕪蓋緬甸暹羅兩國戰場也現已平靖而民未興復惟隣國之民及漢人咸遷其地爲氓英人築新城在港曰日安黑其土產木料胡椒蘇花青黛烟象牙

檳榔荳蔻顏色等物多奉耶穌教敬事教主。他威部北極出地自十度三十五分及十五度三十分長百一十里闊十里沿海東連暹羅廣延皆山高四百丈其海邊多港汊其洲低其島皆石產錫多象牙木油紅木燕窩海參木料檳榔民性愚野奉天主教前緬甸官勒索居民有貲卽奪故百姓媮惰今則各安其分又漢人多遷居之每年國所費銀五萬五千兩其護守兵千五百丁水師船三隻。地那悉林部地最窄在海邊南及燕來由地皆密林難通路其島繁多地甚磽瘠產檀香巴

馬油紫梗樹脂乳香南果尤香美在海邊燕窩海參珍珠皆歛之民其民無居處惟浮海面絕不耕田止以海味爲食其都會曰墨危英軍士常攻擊此地蓋阿瓦國都恃地險瘴惡爲負固其瀕海之地則暹羅英吉利常吞并之焉

附人緬路程

見師範
滇繫

由騰越州城南六十里爲囊宋爲南甸土司故爲府由南甸左行六十里爲龍拘樹又五十里爲杉木籠山山之險者也又三十里爲蠻隴又六十里爲隴川土司又

四十里爲那中山、又一百里爲猛卯土司、凡四百二十里、自南甸右行二十里至沙冲、二十里至猛宋、五十里至黃陵岡、五十里至千崖土司、八十里至蓋達土司、三十里至太平街、又自翁輪三十里至銅壁關、凡三百五十里、此自騰越州南分左右之里數也、自隴川八十里至腊撒土司、戶撒在其北四十里、自腊撒至鐵壁關八十里、由鐵壁而左、三十里至蠻等七乎里、至虎踞關、又五十里至南喜、三十里至等拐、又十里至天馬關、此境內南行之里數也、至於臨夷之路、則有五十、自騰北道

四程至茶山界自騰西道八程至里麻界十程抵孟養
境十一自州南三程至南甸三程至干崖四程盡達蠻
山此程由蠻嶺至猛密五十七程至緬甸三千里有奇
至南海一自騰南六程至南甸四程至隴川西南又十
程至猛密轉達緬自隴川東道又十程至木那轉達景
綏國一自騰東南道六程至蒲窩二程至莊市轉達鎮
康舊謂古臨夷之路皆撫剿所必由惟茶山而西號野
人境峭壁不可梯繩弱水難於舟筏而茶山里麻前明
設有兩長官司明季時爲野人所驅奔入內地今尙有

早土司後裔已爲齊民其地閉塞不通久矣至阿瓦之道出銅壁鐵壁虎踞三關皆可乘船赴緬惟猛卯出天馬關陸路多於水道前用兵時密探其路自天馬關五十里而小蠻又五十里而蔓布三十里而猛卡四十里而蠻空四十五里而猛老四十里而猛勒四十五里而蠻黑六十里而猛密土司三十里而布亞七十里而章谷洞三十里而尼孤凡五百九十五里然後下船兩日卽抵阿瓦歷彥得上漿謬直埂至阿瓦約三百里計天馬關至阿瓦水陸兼行不過九百里耳而明將軍征緬

由木邦出天生橋取宋寨其地散漫小徑叢出深入無
繼必至潰散傳經略由萬仞關四十里歷猛弄蠻埋止
丹來戛南蓋河又三十里出戛鳩渡江十里蠻乃三十
里蠻報又三十里麻里而至猛拱百五十里南烏賴三
十五里沙河三十里深溝又六十里而至孟養其地至
阿瓦甚遠且路徑不熟炎天瘴盛因回師而駐老官屯
其路則出鐵壁關五十里而至猛卡又五十里而至楞
木又十里而至洗帕河歷猛允猛暎而至新街趙宏榜
所敗績處也南行卽爲老官屯臨大金沙江賊分扼江

之東西我軍偪其東寨而駐故造船之議謂元人征緬
以此取勝也要在熟悉地勢多集兵力出其不意耳緬
人善於操舟舟之頭尾多置西洋大礮旋轉如飛趙宏
榜新街之敗爲其礮所擊潰又提督常青言二十四年
駐兵江岸時月夜見江中出數象象背載十人逆流起
伏甚捷水中用象載兵古所未聞并誌之以諗知兵者

附大金沙江考

魏源

緬甸之西與五印度國分壤以大金沙江爲界其源出
於西藏卽雅魯藏布江也源出後藏西界之阿里達木

楚克喀巴布山會諸水東流二千五百餘里入中藏復
會木倫江東南流千二百餘里經中藏之南界過緬甸
之阿瓦都城轉西南流至東印度會恒河注南海其源
流皆不入雲南境滇人謂之大金沙江對岷江所會之
小金沙江而言小金沙江入東海大金沙由緬甸入南
海故黃貞元謂此卽禹貢之黑水其說曰大金沙江瀾
滤三水雖同出吐番同入南海然大小遠近迴殊滤四
倍于瀾大金沙十倍於滤瀾滤所出源近而狹大金沙
江上源相傳近于闐國自里麻茶山至孟養極北號赤

髮野人境峭壁不可梯繩弱水不任舟楫土人惟遠見
川外隱隱有人馬形皆生番之域也今姑畧其源惟自
經流支流入海可見者言之水流至孟養陸阻地合大
居江檳榔江二水方名大金沙江蓋以別麗江北勝武
定馬湖之小金沙江耳自此南流至猛寧有一江西來
入之又南下經蠻莫有大盈江自騰越經鎮夷南甸干
崖爰展西茶山古剎諸水伏流南牙山麓出蠻莫來入
之又經蠻法魯勒孟拱遮釐管屯大小昌蒲峽至戛撤
昔年緬人攻孟養以船運餉到戛撤爲孟養所敗者此

江也正統中蔣雄率兵追思機法爲緬人所壓殺於江中亦此江也江自蠻莫以上山聳水陡正統中郭登自貢章順流不十日至緬甸者亦此江也下流經溫板有龍川江自騰越經界尾高黎其山隴川猛乃猛密所部來入之下流又經猛吉準古溫板猛戛馬達刺至江頭江中有大山極秀聳山有大寺又有一江自猛辨洗戛母南來入之又經止卽龍大馬革底馬撒躋馬入南海其江自蠻莫以下地勢平衍濶可十五里有奇益南江益寬流益緩緬人操舟如涉平地至是江海之水滂爲

一色矣。按此說所指大金沙江，其上流卽今雅魯藏布江，在西南荒徼外，其下流又逕緬甸，始終不入雲南。去禹貢雍梁二州甚遠，因難指爲禹跡所導之黑水。然此江中段則爲緬甸與東印度分界，下游則金沙江會岡噶江全由東印度入海。岡噶江卽佛經之恒河，其與金沙江會以後，謂之安日得河。又曰安治市河，又作激治斯河。故坤輿全圖無大金沙江，蓋統歸于安日得河也。英夷所繪大清國圖有雅魯藏布江會恒河入海，所繪印度圖則有蒲蘭蒲達江自東而西會激治斯河入海，卽大金沙江西

會恒河之異名蓋圖中國則用中國之名圖外國則用外國名也榜葛刺跨恒河之東西兩岸惟以東距大金沙江與緬甸廓喀等國分界英吉利曾攻印度乘舟溯流直向阿瓦而澳夷新聞錄中又嘗恐中國兵假道緬甸攻東印度皆以此江下游直抵孟加臘之故一統志謂其西南流入厄訥特珂國亦指其下游入東印度之恒河而言第語之不詳故于坤輿圖說之安日得河欲指爲恒河則無大金沙指爲大金沙則無恒河不知二大水下游滙合爲一也大金沙江未會安口得河以前其

東岸爲緬甸西岸爲廓爾喀諸國及會安日得河以後
東南岸下游爲英夷所奪緬地西南岸爲榜葛刺蓋古
里地介金沙江及恒河之間而榜葛刺則在恒河入海
口岸皆東印度境其緬甸雲南間尙有南掌胡廬景線
景邁等國皆入貢中朝以非濱海不入是志

魏源曰乾隆三十四年緬甸老官屯之役賊樹柵固守
官兵鏖戰彌月堅不可拔卽四洲志所謂緬甸兵法專
以大木立柵自環爲不可敗有時英吉利兵亦爲所遏
蓋緬甸南瀕海嘗與英夷之印度交兵故英夷知其長

技也。又考劉健庭聞錄：順治十八年二月，李定國自文選攻緬於阿瓦。阿瓦城甚高大，城外二江大曰蘭鳩小曰南葛臘，環城三面皆水，惟一面通陸。自白文選師旋後，並鑿之引水爲湖，留堤三道，置木城其上，距城四里。定國遣人索永歷不應，而于木城之外更立木城，出兵守之。有間木城前復立一城，步步前進。旣偏定國營，始出兵大戰。前隊皆象，中有花象善突陣，爲羣象先。定國視戰地，當象來處有石橋，自持長刀迎待。象鼻卷刃立斷，負痛反奔。羣象皆奔，文選定國鼓噪乘之，斬其大將。

邊牙猥殺其兵萬緬收餘兵保柵固守此卽樹柵自固
步步爲營之證其失在於出柵野戰反以象陣自挫前
鋒故爲白李所敗惟敗後而木柵尙存退可以守故阿
瓦終不得破所謂善戰者不敗善敗者不亡也明瑞哈
國興皆嘗登山俯瞰破其一二柵而十餘柵皆潰及老
官屯之役賊懲前失先據高立柵又固守不出戰我兵
百計攻之終不能拔是緬兵短於野戰長於憑柵具徵
四洲志所言之不妄故上兵之紀律敵莫能禦中兵之
紀律敵莫能侮觀於緬柵之足拒夷兵而知我之所以

守觀於安南札船之足懾夷艇則知我之所以攻

海國圖志目錄

東南洋海島各國

卷之十一

呂宋夷所屬島

卷之十二

荷蘭夷所屬

波羅哇浮泥瓜大島

英荷布路三夷分屬地間等島

卷之十三

英荷二夷所屬葛留巴島

卷之十四

葛留巴所屬島

卷之十五

英荷二夷所屬亞齊及三佛齊島

荷佛二夷所屬美洛居島

卷之十六

英夷所屬新阿蘭島

卷之十七

日本島

卷之十八

附東南洋諸島形勢

附東南洋鐵路

海國圖志卷十一

東南洋

海島之國
本無皆今補

原

邵陽魏源輯

呂宋夷所屬島一

原名蠻里刺島明
季改名小呂宋

明史呂宋島居南海中去漳州甚近洪武五年正月使使偕瑣里諸國來貢永樂三年十月遣官齎詔撫諭其國八年與馮嘉施蘭入貢自後久不至萬厯四年官軍追海寇林道乾至其國國人助討有功復朝貢時佛郎機強與呂宋互市源案呂宋島本名蠻里喇明季為西洋呂宋夷船所據中國人因呼曰小呂宋蓋對其本國而稱之猶瓜哇島之稱改新荷蘭也明史誤以呂宋為此島本名因妄謂呂宋島藏於佛郎

機誤甚至今此信尚有呂宋鎮守之兵無佛郎機之兵久之見其國弱可取乃奉

厚賄遺王乞地如牛皮大建屋以居王不虞其詐而許

之其人乃裂牛皮聯屬至數百丈圍呂宋地乞如約案

云圍蠻里喇地乞如約王大駭然業已許諾無可奈何遂聽之而

稍徵其稅如國法其人既得地即營室築城列火器設

守禦具爲窺伺計已竟乘其無備襲殺其王逐其人民

而據其國名仍呂宋寶佛郎機也案當云改名呂宋其實呂宋國自在西洋

也先是閩人以其地近且饒富商販者至數萬人往往

久居不返至長子孫佛郎機既奪其國案以後佛郎機字均當作呂宋

其王遣一酋來鎮，慮華人爲變，多逐之，歸留者悉被其侵奪。萬厯二十一年八月，酋郎雷傲裏係勝侵美洛居，役華人二百五十助戰，有潘和五者爲其哨官。蠻人日酣臥，而令華人操舟，稍怠輒鞭打，有至死者。和五曰：「叛死，箠死，等死耳，否亦且戰死，曷若刺殺此酋以救死？」勝則揚帆歸，不勝而見，縛死未晚也。衆然之，乃夜刺殺其酋，持酋首大呼，諸蠻驚起，不知所爲，悉被刃，或落水死，和五等盡取其金寶甲仗，駕舟以歸。失路之安南爲其國人所掠，惟郭惟太等三十二人附他舟獲返。時酋子

郎雷猫吝駐朔霧聞之率眾馳至遣僧陳父寃乞還其戰艦金寶戮仇人以償父命巡撫許孚遠聞於朝檄兩廣督撫以禮遣僧置惟太於理和五竟畱安南不敢返初曾之被戮也其部下居呂宋者盡逐華人於城外毀其廬及猫吝歸卽令城外築室以居會有傳日本來寇者猫吝懼交通爲患復議驅逐而孚遠適遣人招還蠻及給行糧遣之然華商嗜利趨死不顧久之復成聚其時礦稅使者四出奸宄蠭起言利有閩應龍張嶷者言呂宋機易山素產金銀採之歲可得金十萬兩銀三十

萬兩萬歷三十年七月詣闕奏聞帝卽納之命下舉朝
駭異言官金忠士曹於汴朱吾弼等連章力爭皆不聽
事下福建守臣迫於朝命乃遣海澄王時和百戶于一
成偕巖往勘呂宋人聞之大駭華人流寓者謂之曰天
朝無他意特奸徒橫生事端今遣使者按驗俾奸徒自
窮便於還報耳其酋意稍解命諸僧散花道旁若敬朝
使而盛陳兵衛迓之時和等入會爲置宴問曰天朝欲
遣人開山山各有主安得開譬中華有山可容我國開
耶且言樹生金豆是何樹所生時和不能對數視巖巖

曰此地皆金何必問豆所自其上下皆大笑畱疑欲殺之諸華人共解乃獲釋歸時和還任卽病悸死守臣以聞請治疑妄言罪事已止矣而呂宋人終自疑請天朝將襲取其國諸流寓者爲內應潛謀殺之明年聲言發兵侵旁國厚價市鐵器華人資利盡出而驚之於是家無寸鐵會乃下令錄華人姓名分三百人爲一院入卽殲之事稍露華人乃羣走萊園會發兵攻衆無兵仗死無算奔大崙山蠻人復來攻衆殊死鬪蠻兵少挫會旋悔遣使議和衆疑其僞撲殺之會大怒歛衆入城設伏

城旁衆饑甚，悉下山攻城，伏發，衆大敗。先復死者二萬五千人，曾尋出令諸所掠華人贄，悉封識，貯庫移書閩中守臣，言華人將謀亂，不得已先之請，令死者家屬往取其孥與賄。巡撫徐學聚等亟告變於朝，京師驚悼，下法司議奸徒罪。萬曆三十二年十二月，議上帝曰：『嶷等欺誑朝廷，生靈海外，致二萬商民盡膏鋒刃，損威辱國，死有餘辜。』卽梟首傳示海上，并移檄呂宋，數以擅殺罪，令送死者妻子歸，竟不能也。其後華人復稍稍往，而蠻人利中國互易，亦不拒。久之，復成聚，時佛郎機已并滿

刺加益以呂宋勢愈強橫行海外遂聚廣東香山澳築城以居與民互市而患復中於粵矣

明史沙瑤與吶囉囉遠壤皆與呂宋近男女蓄髮椎結男子用屨女子跣足以板爲城暨木覆茅爲室崇釋教多建禮拜寺男女之禁甚嚴盜不問大小輒論死孕婦將產以水灌之且以水滌其子置水中生而與水習矣物產甚薄華人商其地所攜僅磁器銅釜之類重者至布而止後倭即機據呂宋多侵奪鄰境惟二國號令不能及

皇朝通考四裔門呂宋居南海中在臺灣鳳山沙馬崎東南本朝崇聽中呂宋遣使進貢於明使臣畱闔末還順治三年福建平守臣送其使入都四年六月遣

歸本國康熙五十六年以呂宋等國口岸多聚漢人禁止商船往南洋貿易雍正五年後通市如故十三年正月呂宋以麥收歉薄附洋船載穀二千石銀二千兩海參七百觔來廈門欲易麥二三千石時提臣王羣以例禁五穀出洋奏請 詔曰國家嚴禁五穀出洋者乃杜奸商匪類暗生事端若各國米糧缺少隨時奏聞朕尙酌量豐餘以濟之今載穀易麥更近情理著均平糴糴以濟其用

又曰于絲鴈在西北海中與英吉利相近風俗與英吉

利同其國王姓名傳國世次無考每歲駕夾板船來廣東互市據呂宋速巫等處爲貿易之處干絲臘國常分遣小王鎮守呂宋云考佛郎機在明時旣襲據呂宋今干絲臘亦分守呂宋蓋舊國已空島夷互踞難以實稽也

源案

干絲臘卽太呂宋之屬國明時佛郎機亦無襲取呂宋島之事此沿明史之誤

漳州黃可垂呂宋紀畧曰呂宋島爲干絲臘屬國干絲臘者西洋番國名也與和蘭勃蘭西紅毛相鼎峙俗呼爲朱仔又曰實班牙一作是班牙閩廣中所用銀餅肖其國主之貌而鑄者也海之東南數千里外卽呂宋島

焉東界萬蘭澗仔低大海西界闊廣大海南界蘇祿大
海北界萬水朝東大海計其地三千里有奇南北東西
相去各千餘里與海相距亦數千里形勢負東面西內
外中三湖各廣三百餘里土番戶口不下數萬餘金珠
玳瑁冰片燕窩海參烏紅木魚鹽之利甲於海外前明
時千絲臘據其國建龜豆城於外湖西海之濱鎮庚逸
嶼於城之西左角以控制遐邇土風最重番僧設巴禮
院行禮拜之教巴禮者番僧也以濂水爲令將晝作夜
院各擊鐘以定時子午爲中天初點未亥各十二點重

高車不祀先祖所奉之神惟叻氏而已尤可怪者巴禮
爲人改罪人俱以爲榮濂水者以巴禮王之尸煎爲膏
脂有教父掌之將奉教之時令人自誓其身爲叻氏所
出誓畢巴禮將尸水滴其頭故曰濂水有女尼院專司
財賄以供國用其院封鎖極嚴男子絕跡威望甚尊千
絲臘所造甲板船極大帆檣甚固鎗礮畢備洋寇不得
近往來呂宋間皆用量天尺照水鏡淺石沉礁無不洞
悉其法更妙於指南車華人之客呂宋者恒樂其舟楫
之利而喜其制度之巧焉其甲板船來呂宋計程行三

月迨其船回本國水性不同行須五月華人貿易往來
相安數百年矣 國朝乾隆年間西北海之紅毛英圭
黎番猝造甲板船十餘直偏呂宋欲踞其地化人巴禮
願納幣請解英圭黎遂返余因經商呂宋爰紀其畧
陳倫炯海國聞見錄曰東南諸洋自臺灣而南臺灣居
辰巽方北自雞籠山至南沙馬崎延袤二千八百里與
福興泉漳對峙隔澎湖水程四更隔廈門水程十有一
更西面一帶沃野東面俯臨大海崇禎間爲紅毛荷蘭
人所據鄭成功奪之康熙二十二年鄭克塽歸順方入

版圖惟呂宋島至今爲西洋人所據其島在鳳山沙馬
崎之東南居巽方距廈門水程七十二更北面高山一
帶遠視若踞齒俗名宰牛坑山有土番屬於呂宋與沙
馬崎西北東南遠拱中有數島惟一島與臺灣稍近者
名曰紅頭嶼有土番居住無舟楫往來語言不通食薯
芋海族之類產沙金臺灣曾有舟到其處呂宋大山北
從宰牛坑延繞東南昔爲大西洋千絲臘是班亞所據
是班亞國亦名呂宋國故以名此島地宜粟米長者五
六分漳泉人耕種營運者甚盛年輸丁票銀五六金方

許居住經商惟守一隅四方分定不許越界地原係土番今爲呂宋據轄爲東南洋貿易最盛之地因大西洋千絲鰲是班亞番舶所聚立教寺建城池聚夷族漢人娶番婦者必入其教禮天主堂晨鳴鐘爲旦方許開市午鳴鐘爲夜闔市不敢往來昏鳴鐘爲日燈燭輝煌如晝營生夜半鳴鐘爲夜以開市肆晝夜各以三時辰爲日爲夜傍午捉夜禁闔地皆鬼市

謝清高海錄小呂宋島本名蠻里喇在蘇祿尖筆闌之北亦海中大島也周圍數千里今爲西洋呂宋國所轄

故改名小呂宋地宜五穀土番爲英西鬼與西洋同俗
性情強悍樂於戰鬪呂宋在此鎮守者有萬餘人中華
亦多貿易於此者但各寓一方不能逾境欲通往來必
請路票歲輸丁口銀甚重土產金及烏木蘇木海參所
屬地有名伊祿古者小呂宋一大市鎮也米穀尤富其
東北海中別峙一山名耶黎亦屬呂宋其人形似中國
其地產海參千里石塘在是島西船由呂宋北行四五
日可至臺灣若西北行五六日經東沙又曰餘見擔干
山又數十里卽入萬山到廣州矣東沙者海中浮沙也

在萬山東故呼爲東沙往呂宋蘇祿者所必經其沙有二一東一西中有小港可以通行西沙稍高然浮於水面者亦僅有丈許故海船至此遇風雨往往迷離至於破壞凡往潮閩江浙天津各船亦往往被風至此泊入港內可以避風掘井西沙亦可得水沙之正南是爲石塘

萬國地理全圖集曰小呂宋島在中國東南北極出地自十二度至十九度偏東自一百二十四度至一百二十八度長一千二百里闊三百四十五里居民六十萬

丁其內地甚高樹林稠叢有火山往往地震出白糖棉花麻加非煙柯柯子卽外國人等所用烹爲飲也泉州人年年駕船至呂宋港稱爲馬尼刺古時未屬是班牙國土蠻居之山內黑面之族髻髮服樹皮棲茅屋土雖膏腴卻憚勞甯餓死不工作明永樂間國王遣臣進貢往往招漢人來居其國隆慶四年是班牙兵船取其地爲本國之藩屬開墾勤勞與澳門英吉利亞默利加各國通商馬尼刺城晨時鳴鐘爲日方許開市肆經營午亦鳴鐘夜時闔市其風俗與澳門西洋差不多父母已

聘僧沒婚姻世務亦是僧所料理人死貯以布囊富者納資較多寡埋堂上基內貧者埋牆外三年一清棄骸骨於深澗其民大半奉天主教餘尙固執已見不肯曰化其僧理其內地如官憲且百姓拜之如菩薩然

謝占王曰

寧波海商道光六年江蘇海運出力保奏巡檢

呂宋距關最近其疏

濬海口之法中國似可仿行蓋二十年前呂宋內河入

海之雞峙口洋面計長三百六十里闊二百餘里因內

河流沙入海口門淤淺舟行阻滯而汪洋一望難從水

底施工會英吉利番船至彼不能進口英吉利人固多

巧技精於樞紐轉旋之法，遂置轉盤器具，設法疏濬。縱橫數百里，淺沙不半年悉皆通暢。從此大船揚帆直入，均無阻礙。其法皆借轉輪之力，以代人工所用器具。以長方式船若干隻，自船腰以至船頭，分開兩爿，如凹又中橫插車盤，一如水車式。車邊離水底數寸深淺，仍可伸縮。船面橫眠轉輪一道，若干人踏之，使車盤轉動。再用太播箕一，可裝土數千觔。箕底設車輪兩道，箕口鑲鐵如耕田之犁。再用兩鐵索長數丈，一頭繫於車盤，一頭縛於箕口。車轉輪動，則播箕拉近船邊，鐵犁耕過，則

沙土捲入箕內面上別設鶩架車起播箕將沙傾入小船刺往他處其船四面拋定錨纜不令移動專在中洪逐節挑深使河溜奔激中洪自能逐漸深闊既省人力又易成功此某昔游閩中與呂宋舵工交好覽其所記海道鍼譜內附此法惜未目覩一切器具爲恨近在天津偶與海船舵工談及方知有鎮海王思高者昔爲呂宋舵工今因年老退歸曾親見此項工程言之尤備近聞南河舊有混江龍鐵筴箕用以疏刷河底迄今用之不效其故由於黃河屢次決口分洩河流溜緩沙停以

致海口河身一例平坦河面尙有溜勢河底卻同平水
雖用鐵篋箕挑刷無奈隨刷隨停非如昔年河身高下
懸殊溜勢徹底奔騰河底積沙稍爲挑動卽能挾溜遠
行也因憶昔年航海常遇泊船錨纜並無風浪忽然移
動舟人亦不解其故今始悟及海口潮溜小則面溜底
平大潮則徹底奔流要知錨齒插入沙中則錨柄錨纜
皆能布水下趨冲開海底泥沙無怪錨齒露出因而移
動勢使然也竊復進而思之方今河底溜勢平緩不能
挾沙入海可否卽仿布水冲沙之意用船千數隻舵尾

皆掛一披水板兩邊再加鑲板闊數尺長數丈以外洋
硬木爲之加以石墜使一頭沉入水中其式如削瓜之
鑲其板下置車輪一道使板離水一二尺輪在河底轉
動水從板下布出涯沖河底再掛鐵籠箕於船腰且籠
且沖自下而上逐節疏通船隻衆多乘風而上順流而
下使河底沙水刻不停緩冀可挾沙入海或亦節省人
工之一法歟布水沖沙之法如果試有成效可至浙江
甯台兩府雇募釣船一二千隻航海入淮其船尖頭闊
尾河海並行善於掉舵但非頂頭逆風稍得傍風便能

逆流而上乘春夏東南風順利大小統計每船五人足以應用每日給與工食並船價銀二兩之數所費尙屬有限事非經驗不敢自信惟值當事大人念切河漕不揣鄙陋謹述所聞參以臆見用備芻採

源案此說疏濬海口法專在中

洪逐節濬深使河流奔激中洪自能逐漸深闊蓋先仿河工混江龍鐵掃帚之法以引水歸槽繼卽用對埧偏溜之意以水力攻沙非全恃船輪人力卽能浚深數百里海口于半載之中也其船四面拋定錨纜不令移動亦非梭船來往梭織之謂

貿易通志曰西班牙所據之新地爲呂宋島近閩粵產米及白糖椰油珈琲麻煙等道光十二年甲板船百三

十六隻入口出口貨各百三四十萬員居民二百餘萬
納稅甚重然商賈趨之如鶩也其餘南海各洲若蕪萊
西若丁葛盧若彭亨各爲番君所自治者稅餉皆苛故
貿易不盛

地理備考曰呂宋島原名非里比納斯又名桑拉薩羅
在南洋之西緯度自北五度起至二十度止經度自東
一百十四度起至一百二十五度止統計千島大者名
曰呂宋其明達撓蘇錄巴拉彎等則次之岡陵嶺我火
山紛繁地震時作地氣炎熱飄風暴雨不時交作田土

極腴穀果最豐叢林稠密木多上品土產金鐵鉛麻水
銀硫磺朱砂寶石甘蔗桂皮加非胡椒等物各種禽獸
麋弗蕃衍島列四名一名非里比納斯一名明達撓一
名蘇錄一名巴拉彎序列於左 一非里比納斯內島
紛繁呂宋乃其次者也長約一千四百里寬約四百里
境土兩屬一屬大呂宋國兼攝一自設酋長管轄其屬
大呂宋兼攝者十有五部曰敦多部首郡名馬尼辣人
烟稠密五方輻輳泊所穩闊帆檣如林曰加維德首郡
亦名加維德曰瓦稜加斯首郡亦名瓦稜加斯曰不拉

千首郡亦名不拉千曰拉古納首郡名巴薩尼亞斯曰
巴當阿首郡亦名巴當阿曰達亞巴首郡亦名達亞巴
曰邦邦阿首郡波哥羅爾曰桑巴勒首郡名黎昆曰邦
加西義首郡名靈加言曰義羅各斯首郡名維安曰加
加言首郡名義拉安曰新厄西乍首郡名巴勒爾德曰
加馬里內斯首郡名那加曰阿爾白首郡亦名阿爾白
其自設會長管轄者東方海濱暨島中一帶地方皆各
立會長管理其桑馬爾島外屬大呂宋國兼攝中屬會
長管轄其勒德島西方海濱屬大呂宋國兼攝餘皆會

長管屬曰塞布曰波和皆屬大呂國兼攝曰內哥羅斯
其海濱係大呂宋國兼攝餘皆會長管轄曰巴乃其海
濱係大呂宋國兼攝內地爲會長管轄曰加拉米亞那
屬大呂宋國兼攝曰明多羅大呂宋國兼攝無幾會長
管轄居多 一明達撓島又名馬仁達撓長約一千里
寬約五百里迴環約二千八百里地分三屬一屬大呂
宋國兼攝一屬明達撓王統轄一係會長自爲管屬其
屬大呂宋國者分爲三部首郡曰桑波昂安在西南方
曰迷薩米斯在北海濱曰加拉加在東海濱其屬明達

撓王者境土廣闊首郡名塞蘭安建於北蘭日河濱乃
本國都也其會長管屬者在西方內設三十三酋各霸
一方互相結盟一蘇錄島小島紛繁大者有三曰蘇
錄曰達維曰巴黎蘭皆屬蘇錄王統攝首郡名北彎乃
國都也土人多務劫掠海面尤爲滋擾一巴拉彎島
又名巴拉瓜長約九百五十里寬約一百二十里內地
土人自理海濱大半爲蘇錄王兼攝東北海濱爲大呂
宋國兼攝

萬國地里全圖集曰南海各島北極出自十二度至南

極十度偏東自入十五度至一百三十五度各出南地
物產天氣雖熱然海風常吹霖雨時沛草木暢茂四時
之景各極其佳 又曰南海各小島在小呂宋之南者
有撒馬島馬鄰得島把刺灣島泥鄂巴島尼末巴地島
西武島馬泥島邦閔島多羅來地島天氣物產與呂宋
不異大半歸是班牙所轄居民共計二百二十四萬丁
又曰小呂宋西蘇錄羣島雖小而物產甚多出珍珠
玳瑁蘇木荳蔻鸚鵡降香藤福建廈門船屢赴其島互
市居民爲海賊肆行劫掠與呂宋兵船交戰獲勝人戶

繁多五穀不足必買運別處

外國史畧曰小呂宋各島在中國之東南廣袤方圓四千七百里居民六百萬丁其島嶼洲甚多延自北極出五度及二十度多雨有火山常地震而土則豐盛出米烟糖加非萇萇甚盛米穀有餘皆運售中國有大樹可爲桅又出蠟密糖好馬野牛其土人體矮語音風俗各殊百姓順長敬尊然素性詭詐販賣人口爲奴今多歸天主教固守禮儀其奉回回教者以海盜爲業山內則皆黑面人未向化以草果爲食明朝時島君入貢中國

自明以來多福建泉州人每年商船大集亦多遭壞其羣島曰閩他邦島撒馬島米地島巴尼島西布島閩多羅島其最大者惟呂宋爲是班亞國兵所駐於明嘉靖三十九年是班亞船始到此島隆慶二年調師船往據其地其土人多不服及今日尙有島不屬所轄者是班亞既與中國日本開通商之路貿易歲倍唐人來不勝數釀成巨衅爲是班亞所誘戮者幾萬人乃立法律惟准商賈居住船回商亦回惟入天主教始准任意居住焉更兼管束其貿易禁例煩擾惟泉州船恒時來往乾

隆二十六年是班亞國與英人戰英人將奪其地計以重賂始退兵焉然其銀今日尙拖欠也後與亞默利加通商每年二三巨艦裝十五萬石價值約千二百萬員由亞默利加所運出者多銀條或中途與他國交戰而失其船則所損重矣嘉慶年間亞默利加藩屬地自立爲國不受是班管轄廣開港口所獲利漸微乃復調兵帥以代治其島會同土人護守之每年國帑所收銀百五十萬員所運入之貨約銀五百十五萬七千餘員所運出者約銀百四十三萬六千員其土產每年益增淮

外國任意往來不復禁止故通商愈興旺惟國帑久空所收稅務未足償還本國欠項也○其都在呂宋島曰馬尼臘內多禮拜堂教師甚盛○臺灣呂宋之中間尙有數島屬是班亞國者其居民不多出糧食與他國不往來惟有遭風船到彼尙蒙接濟其難民焉

瀛環志畧曰近年諸番來粵東者多聚於馬尼刺米利堅佛郎西遣酋來通市其船皆會集於此蓋其地爲七洲洋之東岸轉舵北行即入長沙頭門而抵粵東諸番倚爲東道之逆旅薪水糗糧皆取辦於此故近來小呂

宋之繁盛爲南洋諸島之最

又黃毅軒呂宋紀畧云乾隆年間西北海之英黎

卽英吉利

猝造甲板船十餘直溯呂宋欲踞其地化人巴禮納幣請解英黎乃返余按化人巴禮卽天主教之師泰西人皆奉天主教每用其人以解紛然英人之遽肯收兵亦非信巴禮之說也西班牙之有呂宋已二三百年不特市舶流通資爲外府而國勢之所託儼然東西兩境若爲英人所奪則干絲臘亡其半矣彼卽中衰究係西洋大國命脈所關勢且背城借一英國雖強豈遽能滅此

朝食割土於重譯之外，延敵於門闕之間，非計也。故呂宋之不可奪，英人亦明知之，特脅之以威力，待其哀請而罷兵，使之畏我德，我不敢抗我顏行，然後我之市舶東來，卽以彼土爲東道主，而彼不敢斬噶羅巴之已奪而復還，亦同此意，皆形勢之顯然可見者。

呂宋羣島之西南，婆羅洲之東北，有小國曰蘇祿，接連三島，俱渺小而戶口頗繁，本巫來由番族，悍勇善鬪，民多習爲海盜，西班牙旣據呂宋，欲以蘇祿爲屬國，蘇祿不從，西人以兵攻之，反爲所敗，其海產明珠玳瑁，山

產蘇木荳蔻降香藤條又產鸚鵡戶口繁多地磽瘠食
不足糴於別島廈門商船時由呂宋往貿易由厦至蘇
祿水程一百一十更

海國聞見錄謂蘇祿與吉里間文
萊共一土係屬錯誤今更正之